

■ TRIBUNA POLITICA

Co vinavant Grischun?!

DA HANSJÖRG TRACHSEL,
CUSSEGLIER GUVERNATIV

Las votantas ed ils votants dal Grischun han refusà cleramain la lescha davart las taxas turisticas ed han uschia sbittà la pussaivladad da rinforzar cuminaivlamain il turissem e las ulteriuras branschas economicas ch'èn cumbinadas cun quel. Ina ferma malsegirezza dastgass avair chaschunà la refusa. Malsegirezza e discordia èn nau-schas premissas per ch'il Grischun possia dumagnar cun success las sfidas turisticas en in champ competitiv difficil. La candidatura per ils gieus olimpics d'enviern 2022 è ina nova schanza per s'unir, per sa posizuniar en moda competitiva e per sa preschentar a l'entir mund sco destinaziun da sport e da vacanzas. Il project na porscha betg soluziuns per definiziun. Tut las regiuns, tut las branschas e tut ils umans en il Grischun èn dumandads plainamain, ma vegnan er promovids. Natiralmain stat la citad ospitanta San Murezzan en il center da la candidatura. I fiss dentant ina illusiun da crair ch'il giast potenzial da l'India, da la China u da l'Europa vegniss a distinguer tranter las vals alpinas dal Grischun per tscherner sia destinaziun da vacanzas. En emprima lingia tscher-



tga el in'aventura en las muntognas e quai al pudain nus porscher en l'entir chantun. L'infrastructura da traffic e turistica che nus vegnin a renovar ed ad engrondir en connex cun il project po vegnir utilisada da las generaziuns futuras. Sch'igl ans reussescha da sviluppar products innovativs che cumpiglian pliras branschas e pliras regiuns, sa meglierescha nossa competitividad en moda decisiva. La candidatura avra al Grischun ils chanals da comunicaziun d'interpresas ch'èn activas sin plaun mundial. Quai è il forum per preschentar nossas purschidas. Nagin na vul resgiar vi dal rom, sin il qual el sesa – perquai furma la persistenza l'element central dal concept da la candidatura Grischun 2022. Ils gieus duain vegnir organisads en moda ecologica, responsabla e planisada. Ma els duain er

gidar a porscher a las generaziuns futuras in'existenza independenta en la regiun da muntogna. Er noss uffants e noss biadis duain pudair viver e lavurar en il Grischun. Mantegnair l'existent, restar dir e refusar tut quai che savura da progress e da svilup na vegn betg ad als pussibilitar quai. I na vala betg la paina da renviar a gieus olimpics passads e da refusar tals, perquai ch'els èn stads me-mia gronds u n'èn betg stads persistents. Nus stuain ans basar sin nossas qualitads, sin nossas valurs e sin nossa natira grondiusa e nus stuain far insatge auter e meglier ch'ils auters. La candidatura ans porscha las cundiziuns optimalas per far quai ed ella ademplescha in engaschament da la confederaziun envers il Grischun, sco nagin'otra strategia e nagin auter project. Per quest intent ston ins dentant ristgar da far il pass dal studi da realisabladad a la fasa da candidatura. Cun la refurma dal turissem ha il Grischun creà ina buna basa. Ils gieus olimpics en il Grischun 2022 èn in pass profund vers anora. Per ina giada na correspundain nus betg al cliché dal chatschader da subvenziuns, mabain pudain cumprovar nossa capacidad e pudain surpigliar nossa responsabladad visavi l'entira Svizra.